

այն ժամանակ, երբ տերտերը նոյնպես աղօթում է: Եկեղեցու պատերից դուրս՝ նա աստծուն չէ մտաբերում:

Շտապելուց ես մոռացայ մինչեւ անգամ կոճակներս կցել: Ասլանը խոստացել էր այն օրը ցոյց տալ ինձ մեր Հայկ Նահապետի բերդը: Իմ սիրտը տրոփում էր անհամբերութիւնից, թէ երբ պետք է տեսնէի Հայաստանի առաջին ամրոցը, որ մնացել էր այն օրից, երբ հայութեան սկիզբը դրոշմեցաւ:

Երբ ձի նստեցինք, ճանապարհ ընկանք, Արթինի խոստացած երկու ձիաւորները, բոլորովին զինուած, մեր առջեւով գնում էին, թէ որպէս առաջ-նորդ եւ թէ որպէս զինակից: Նրանք սկզբից մեզ զգուշացրին, թէ վտանգաւոր տեղերից պետք է անցնենք: Ես կատարեալ զինավառութեան մեջ էի, Ասլանը նոյնպէս ուներ իր հետ մի զոյգ ատրճանակ: Չգիտեմ ինչո՞ւ սաստիկ փափագում էի ես, որ աւազակների հանդիպէինք: Այնքան խօսուել էր դրանց մասին, այնքան բաներ էի լսել, բայց երբեք աւազակ չէի տեսել:

Գիշերով եկած լինելով, ես դեռ բոլորովին չէի դիտել Հայոց-ձորը: Երբ լոյսը ծագեց, երբ արեւի առաջին ճառագայթները սկսեցին ոսկեզօծել լեռների մառախլապատ կատարները, այդ ժամանակ միայն հանդիպեցաւ իմ առջեւ գեղեցիկ հովիտը իր շքեղ տեսարաններով: Ես հիացած էի, եւ իմ հիացմունքը մեծանում էր այն չափով, որքան բնութեան գեղեցկութիւնները միախառնւում էին անցեալի, ամենահին անցեալի յիշատակների հետ: Ինչե՞ր չէր տեսել այդ հովիտը, ի՞նչ սիրագործութիւնների վկայ չէր եղել նա: Այստեղ մեր Հայկ Նահապետը պատերազմեց Բելի բռնակալութեան դէմ եւ խորտակեց ամբարտաւան հսկայի զօրութիւնը: Այստեղ, Հազկերտի կրօնական հալածանքների ժամանակ, հայ կինը մահակը ձեռին, հայ շինականը զինուած իր մանգաղով, առաջին բողոքը բարձրացրին խղճի բռնաբարութեան դէմ եւ, յարձակուելով պարսից մոգերի վրայ, ջարդեցին նրանց, եւ կրակ տալով նոր հիմնուած բոլոր ատրուշաններին եւ մոխիրը ածելով ծովի մեջ, մաքրեցին իրանց հայրենիքը այդ պղծութիւնից: Ասլանը ինձ ցոյց տոնեց հին Մոխրաբերդը ծովի մօտ, որ այժմ մի գիւղ էր. այստեղից ածեցին ծովի ալիքների մեջ հրդեհուած ատրուշանների եւ որմզդական մշտավառ կրակի մոխիրը եւ այդ պատճառով կոչուեցաւ Մոխրաբերդ:

Հայոց-ձորում դրոշմեցաւ քրիստոնէութեան սկիզբը՝ մեր Աբգար թագաւորի օրով: Ասլանը այդ մասին շատ բաներ էր պատմել ինձ, ինչ որ գրոած էր գրքերի մեջ: Բայց ես սիրում էի ժողովրդի պատմածը, կենդանի ժողովրդի պատմածը, որ նա աւանդաբար լսել էր իր նախորդներից: Ես կը դնեմ այստեղ այդ աւանդութիւնը, աւելի այն պատճառով, որ նրանով բացատրւում է Անգղ գետի անուան ծագումը: Այսպէս է պատմում ժողովուրդը: